

# Vun driveriver

---

erscheint auf [www.lenauheim.de](http://www.lenauheim.de)

monatliche  
Erscheinung

Juli 2015

von Helen Alba

## Egydius Haupt – de Uronkel vun eem Rosmareinermädl

„E Gedenktafel soll an Egydius Haupt erinnre“. De Satz hat mei Kumradin Helga in der „Banater Zeitung“ vum 20. Mai 2015 gelest. Es war es Programm der Heimattäch angekündigt. Un angfiehrt, dass in Sacklas der Egydius Haupt geehrt werd. Un ab dann han em Helga sei Gedanke anfang Porzelbaam zu schlaan un es hat momentan sei Schwester Gerda angeruft. „Kannscht dich erinnre, wie unser Lissi-Oma immer vun dem Mann, Egydius Haupt, erzählt hat? Des war doch ihre Onkel, wann ich mich gut erinnere! Also de Bruder vun ihrem Ota! Un des bedeit dann, dass mir un unser Martina Nachkommen sin vun dem Schriftsteller!“

Jetzt is es Gerda in Trabb kumm. Es hat sich natierlich erinnere kenne, was die Oma frieher erzählt hat. Un hat ach gewisst, dass de Kovacs-Lehrer dere Lissi Oma mol e Zeitungsartikel iwer Egydius Haupt gebrung hat. Es hat anfang zu suche un hat wirklich e handschriftliche Artikel gfun. E Beweis, dass Martina Nenadov, Schillerin der fünfti Klass im Temeschwarer Lenau-Lyzeum un Mitglied vum Jugendtrachteverein „Banater Rosmarein“, die Ur-Urnichte vun Egydius Haupt is. Also sin ich vun dem allem in Kenntnis gsetzt gin.

## Wer war Egydius Haupt?

Egydius Haupt entstammt aus eener kinerreichi Bauernfamilie. Sie ware ihre siewe Brieder un zwaa Schwestre. Er is 1861 in Bogarosch uf die Welt kumm. Dort war er ach bei eem Kurschmied in der Lehr. Derno hat er in Wien e zwajährliche Veterinärkurs abgeschloss. Wieder zruck ins Banat kumm, hat Egydius Haupt sei Wohnsitz in Sacklas ufgschlaa, is uf Baratzhausen umgezoo un wieder uf Sacklas zruckkumm, wu er dann 35 Jahr Veterinärtechniker war. 1927 is Egidius Haupt uf Johrmakr gewannert, wu er bis zu seim Ablewe 1930 bei seiner Tochter gewohnt hat.

Egidius Haupt hat ab seim 26 Lewesjohr anfang sich schriftstellerisch zu betätiche: Mundartgedichter un Erzählunge, die in deutsche Zeitunge un Kulennre erschien sin. 1903 is sei ersches Buch „Banater Kleenichkeite“ gedruckt gin. 1925 hat er die Monografie der Gemeinde Sacklas gschrieb, drum is er ach jetzt noh so langer Zeit geehrt wore.

Im allgemaine hat Egydius Haupt in der Bogaroscher Mundart gschrieb. Drum were ne sei Landsleit immer in Ehre halle.

## E Schwowin bsucht die Zeitungsredaktion

Nikolaus Haupt (1903 – 1992) war de Sohn vun Egydius Haupt. Journalist, Schriftsteller un Iwersetzer. Ach Mitglied im Rumänische Schriftstellerverband, Filiale Temeschwar. Nikolaus Haupt war Redakteur der „Banater Deutschen Zeitung“, „Neueste Nachrichten“ un sogar der „Neuen Banater Zeitung“.

Des alles han ich mit meiner Kumradin Gerda besproch. Es studiert e Weil un ment: „So is des, wann mer jung is. Mir han jo villes erzähle gheert, was uns mit de Johre entgang is. Jetzt erinnere ich mich, dass mei Oma oft erzählt hat, sie war in Temeschwar inkaafe un is ach bei der Zeitungsredaktion gewenn. Selmols han ich mich gfroot: Was macht e eenfachi Schwowin dorte? Un jetzt weess ich’s: Die Lissi-Oma hat halt ihre Gschwisterenkl, de Nikolaus Haupt bsucht“.

Un mir erinnere uns ach an de Kovacs-Lehrer, de mer noch gut gekennt han. Er hat villes iwer Bogarosch gewisst un ufgschrieb. Schad nor, dass es meishti verlorn gang is.